

RICERCA: I LAORI DE 'NA VOLTA 'NTEI LOGHI

CON LA NUSTRA MAESTRA VEMO FAVELA' DEI LAORI 'NTEI

LOGHI:SEJOLA',VENDEMA', 'NGRUMA' LE ULIE.

ANCOI SE VA A VENDEMA' CON 'L TRATOR,SE TORCOLEJA CON 'L TORCOLO ELETRICO,SE SEJOLEJA CON 'L COMBAI E LA PAJA I LA LEGA 'NTEL BLOCO,PER 'NGRUMA' LE ULIE JE TANTI MECANISMI E AL TORCIO JE DUTE MACHINE MODERNE.

PER QUESTO GHI VEMO DOMANDA' AI NUSTRI NONI,ALDO,ROMAN E LUCIANO, COMO E CON CHE ROBA I LAVORAVA 'NTEI LOGHI CO LORI I JERA PICI.

DUTI I LAORI VEGNEVA FATI A MAN ,CON I MANJI,COI CAVAI O CON I SAMERI

CO JERA 'L TEMPO DELE SEJOLE

'NTEI LOGHI I JEVA A ARA' CON I SAMERI O CON I MANJI E 'L VERGAGNO,POI GHIVOL DRESALA E FREJALA,E I SOMENAVA LA BIAVA.CO LA NASEVA I LA CONCIMAVA E SE 'N MEJO JERA LA JERBA I LA SPRISAVA.PRIMA DE JI A SEJOLA' I GUAVA LA SEJOLA CON LA PIRIJELA CHE I LA TEGNEVA DRIO LA SCHENA 'NTEL MOCAROL PIEN DE ACQUA.

'NTELA STAGION PIU' CALDA I SEJOLADORI I JEVA A SEJOLA'.A CAJA RESTAVA LA FEMENA,CHE POI DA MIJUDI' LA GHI PORTAVA 'L DIJNA' A STI SEJOLADORI.

CON LA SEJOLA I SEJOLAVA LA BIAVA,I 'NGRUMAVA LE MANE E I FEVA I MUCIARI.FINI' DE SEJOLA' I MENAVA STI MUCIARI SUI CARI TIRADI DAI MANJI A VALE SULE ERE ,AL LAVERE'.I BATEVA STA BIAVA CUI LEGNI CHE I CIAMAVA „LE BATE“,CO I FINIVA DA BATI LE MANE CHE LE JERA DESTIRADE SUL'ERA,I SPETAVA CHE VEGNO UN PO' DE BAVA E POI I LA JVENTOLAVA PRIMA CON LA CONCA,'L PIU' GROSSO,E POI CONL CRIBIO,UN GRANDO TAMIJ.

'L DI' DE DRIO I JEVA A MENA', CUI MANJI, LA PAJA ALA TEJA E LA' I FEVA LA MEDA CON 'N MEJO UN GROSSO PAL,'L MIDIL.LA BIAVA I LA PORTAVA AL MULIN PER FA LA FARINA E LA SEMOLA.

'L LAOR 'NTELA PIANTADA DE VIDE –LE VENDEME

A VALE JERA UA MOSCATO E MALVAJIA.

PRIMA DE VENDEMA' 'N PIANTADA GOREVA FA UN GRANDO LAOR SCOMENSANDO DALA STANVERTA FIN A OTTOBRE:ARA' ,SAPA' E CONCIMA' CON 'L LEDAN,'NPALA' LE VIDE CON NOVI PAI,PODA',NETA' I COSTADISI, DESPOI PODA' SE LEGAVA I CAVI CON I VENCHI O CON LA JENESTRA AI PAI E FRA DE LORI I COSTADISI DELA VIDA,DESPAMPINA' LE FUJE CHE NO LE SERVIVA A GNENTE,SOLFERA' CON 'L FOL, LIQUIDA'.PRIMA DE JI A VENDEMA'SE CIOLEVA FURA DALE CANOE LE BOTO E I GHI DAVA 'NA NETADA E I LE BAGNAVA ,I METEVA A POSTO I SERCI.QUALCHIDUN PORTAVA LE BOTO AL MAR E I LE BAGNAVA OGNI DI'.

'NA VOLTA, DUTA LA FAMEJA,PICI E GRANDI, JEVA A VENDEMA' DE MAITINA BONORA CON I CARI MENADI DAI MANJI O DAI SAMERI,SUL CARO SE METEVA LA CASTELADA O LE GRANDE BOTO.

RIVADI 'NTELA PIANTADA OGNIDUN CIOLEVA 'L SO BRENTIN E LE FORFIJE.

CO LE BOTO JERA PIENE SE TORNAVA A CAJA E CON LA GRAMPA DE FERRO SE CIOLEVA L'UA DALA CASTELADA E LA SE METEVA 'NTEL BRENTIN ,DAL BRENTIN LA SE GHETAVA 'NTELA RASPA OLA SE RASPAVA,I GARNEI CAJEVA 'NTELA BOTO E 'L RASPO I LU GHETAVA VIA.LA BUIDURA DURAVA DA OTO A DIEJE DI' E POI SE TRAVAJAVA 'L VIN.LE VINASE LE SE TORCOLAVA CON 'L TORCOLO, E POI I LE UJAVA PER FA L'ACQUAVITA COL LAMBICO.


'L LAOR 'NTEI ULII

PER LAORA' I ULII NO GHIVOL CHE SIO FREDO NE' JASO PER PODALI,PERCHE' SE JE FREDO E GHI SE TAJA I RAMI I POL JASASE E SECASE,ALORA I SE PODA 'N MARSO O AVRIL.POI SE NETA LE ROVOLE ATORNO AI TRONCHI.SE ARA E SE GHETA 'L CONCIME,NONU ALDO OGNI SEGONDO ANO 'L GHETA LEDAN DE CAVAL.CO I JE 'N FIOR 'L LI SPRISA.CO I SCOMENSA A FA

LE ULIE, SE GHI VEN LA MOSCA, 'L LI SPRISA ANCORA. SE SCOMENSA A 'NGRUMA' LE ULIE, CHI 'N OTTOBRE, CHI 'N NOVEMBRE PERCHE' 'L PROVERBIO DIJ - SANTA CATERINA 'L UIO SE RAFINA (25 NOVEMBRE).

PER COLJI LA ULIA I JEVA SUL SCALON, LE ULIE I LE METEVA 'NTEL SACUSO CHE I LU TEGNEVA A TORNO AL COLO.

DESPOI FINI' 'L LAOR I PORTAVA LE ULIE AL TORCIO PER MAJINALE E CUSI' SE VEVA UN BON UIO. 'L UIO I LU METEVA 'NTELE PILE DE SASO 'N CANOA AL FRESCO.




'L CARETO CON LA CASTELADA E LA BOTO

I BRENTINI

'L FOL



PER LIQUIDA'



FORFIJE

'L TORCOLO

LA RASPA




LA SEJOLA

LA PIRIJELA

'L MOCAROL

LA BATA



LE MAJINE

LA PILA

MOTTO: PIPIDI

'L pajef del nustro cor

'Ntel pajef ola vivemo
duti 'nsembro noi foghemo,
per le piase e per le cale
de noto e de di',noni e gnagne;
ridendo e schersando
Castel Bembo visitando
'n alegra compagnia
mai nisun no fa la spia.
Se qualchidun al me pajef
la tristesa un po' la voldo,
duti pronti a juda':
questa si che fe brava fento.
Per le cale de lastroni
quanti bei fbrisoni;
noi la nejo no la vemo
ma 'l mar 'ndi lu gustemo.
femo fo dal fbrisador
e de cao 'nde ghetemo
'nte quel'acqua cristalina
mejo che 'n pisina.
Poi co riva la ora
de torna' de novo a scula
noi preghemo San fuian
che quel'ano sio piu' facile.
Granda e bela fe la palestra
noni e moredi a fa festa
capriole e balonade:
chi fe piu' forto?'Nduvine!
'L campanil da largo
par un pare che da' la man
ai so pici fioi
che coro 'ntel giardin!
Se ti voi 'l mujeo vijita'
'l dinosauro te sta a speta',
per contavi le so storie
de un mondo pasa' e dele so glorie.
Se la nustra Vale un di' ti vijitare'
mai piu' via no ti fare':
questo fe un pajef che ti ciapa 'l cor
e se ti resti sa,'l ti da' duto 'l so amor!

MOTTO: JIGALINE